

# INUIT ATAQATIGIIT

## Inatsisartuni



UKA 2018/pkt.114  
Ulloq 18.10.18  
Mimi Karlsen

**Ilinniarnertuunngorniarfinni ilinniutit, ilinnarnerup ingerlanera, atortussallu allat Namminersorlutik Oqartussanik tapiiffigineqarluni pineqartartut ilinniarnertuunngorniarfinni siunertanut tapersersuisuunersut Naalakkersuisunit misissuiffigineqarnissaannik nalunaarusiorneqarnissaannillu inatsisartunut aalajangiiffigisassaattut siunnersuut. Nalunaarusiaq kingusinnerpaamik UKA2019-mi saqqummiunneqassaaq siunissamut isigisumik pitsaassutsimik qulakkeerininnissamut innersuussinernik imaqassalluni.**

(Siumut Inatsisartunut ilaasortaataat)

Inuup nammineerluni nalilersuisinnaanera pingaaruteqarpoq. Inuk nalilersuinissaminut inuunermini ilikkakkani nalilersuinerminut ikorfarissavai.

Ilinniartitsinermi ilinniartitsisoq kiffaangissuseqarpoq atuakkat suut atorlugit iliniartitsinissaminut. Sunaluunniit iluariguniuk atorsinnaavaa, aamma iluaringisani atorumannigissinnaallugu. Kiffaangissuseq taanna eriagilluinnartariaqarparput aqqutaammat ilinniartitsisup sunilluunniit atortoqarluni atuartitsisinnaaneranut.

Mianersuunneqartussaavorli una: ilinniartitsisup suliassarinnigimmagu atuartitani sunnerniassallugu, politikkimut imaluunniit upperisamut.

Inuit Ataqatigiit siunnersuuteqartut isumaqatigissavaat oqarpata pitsaasunik atuartitsissutinik peqassasoq. Tamanna suliqartitsisup, atuakkiortitsisup nammineq soqutigisarigamiuk qularnaarniassavaa. Kialluunniimmi suliassamik imitsisup iminnermi suliiaa nalileqqaarlugu akuerisarpaa. Taamaapportaq GUX-mi ilinniutinik sanatitsineq. Sanatitsisisup pitsaassuseq nalilissavaa piumasaralugulu.

GUX-mi allanilu ilinniartitsisut ilinniartitsissutissaraat pingaarnerpaasoq tassa: inuup nammineq naliliisinnaanera. Ilinniartoq aqqutissiuunneqartariaqarpoq

nammineq naliliissalluni ilikkarniakkani qanoq pissarsiarissallugu namminerlu nalilerlugu qanoq iginerlugu. Soorlu atuartitsissutigineqartarpoq internetsimi, tusagassiuutini allanilu paasissutissat qanoq ilumoortiginersut atuartup apeqquserlugulu nalilertassagaa.

Taamaammat Inuit Ataqatigit GUX-imi ilinniutinik nalilersuinerlut aningaasanik atuinissaq innersuussutigingilarput. Atuakkammi pitsaasutut nalilerneqaraluarpataluunniit ilinniartitsisup ilinniartulluunniit atorumanngissinnaavaat.

Inuit Ataqatigiit siunnersuut ilalingilarput, naalakkersuisullu allannguutissatut siunnersuutaat ataatsimiissitaliami nalilequllugu.